

macht drey tage an einer kühlen stelle stehen / denn eröffne das glas / vnd
geuß den geferbten Brandtenwein allen fein gemachsam herab in ein
Kolben / was hinten bleibt / das schütte weg / auff das Kõlblein setz ein
geheben Helm / setz es in Balneum Mariæ, vnd Distillir mit lindem
Feuer den Brandtenwein herüber / so wirstu den Safft der Pillen im
Kõlblein unten am boden finden / den kanstu gebrauchen / wie oben ist
angezeigt worden.

Diß ist ein herzlich Secret / vnd ein vorneme kunst / da sonst einer
ein loht / auch bisweilen $\frac{1}{2}$ lb. auß der Apoteken zusammen gesudelt /
vnd gekocht / müste einnehmen vnd austrincken / daß mann ihm von
solchem mit dem Safft / oder ein Pulver einer Erbis groß oder schwer
kann zurichten vnd eingeben / daß so viel vnd subtiler wircket / als wenn
er es in grosser meng / also grob / vnd nicht bereyter hette genossen / vnd
damit du nußn diese herzliche unbekante kunst / vnd edles Arcanum
recht vñ gründlich verstehen lernest / will ich dir ein exemplum von der
schwarzen Nieswurts / Christwurts oder Heylig Geistwurts / (denn
also nennet mann sie) schreiben / des Tugendt Krafft vnd Wir-
ckung kein Arzt genugsam erforschen / betrachten / viel weniger kann
beschreiben / denn durch diese einige Wurzel die vornembsten Kranck-
heiten eines Menschen / mit verleyhung Göttliches willens / curirt vnd
vertriben werden / als dasindt der Schlag / der schwer gebrechen / Was-
fersucht / Zipperlein vnd alle böse Flüsse.

Extractura
Hellebori
nigri.

Dann nimb vnd brich die Bletter von dieser Wurzel abe / des mor-
gens früe vor der Sonnen auffgang / leg sie in einen schatten / also dz die
Lufft von Morgen darüber wehen kan / daselbst laß sie dürr werdē / stoß
sie zu einē subtilen pulver / vermisch so viel als die bletter gewogē haben /
zerstossenen weissen zucker darunter / diß pulver auffgehabe in scatula,
diß gebrauch / wirkung vnd tugend ist diese / nim alle morgē von diesem
pulver ein par messerspißen voll also trucken / nüchtern ein / fast ein par
stundt darauff / so verzehret es alle Flüsse im menschen / vñ alle böse faule
feuchtigkeiten / darauff grosse vñ schwere Kranckheiten erfolgen / wircket
stets drey oder vier stulgänge / ohn alle beschwerung / reiniget dē mensche
auff.

Schwarz:
Nieswurts
Bletter Pul-
ver.